

Minister Michelle Hooyboer-Winklaar

## “Betico Croes tabata un gran protector di nos cultura”

**MANERA** ta un tradicion, despues di e ceremonia protocolario ta sigui e manifestacion cultural pa celebra e fecha di natalicio di Betico Croes. Varios dignatario y invitado tabata presente pa sigui e ceremonia di serca, cu e aña aki a

pone enfasis riba baile folklore. Minister di Asunto Economico, Asunto Social y Cultura, sra. Michelle Hooyboer-Winklaar a hiba palabra na inicio di e ceremonia oficial, den cual el a subraya e motibonan dicon un manifestacion cultural pa Betico Croes. E mandatario a enfatisa cu Betico Croes, banda di su trabou den politica, a dedica hopi na cultura, enseñansa, musica y deporte. Ta p’esey ta na su luga pa rindi honor n’e

persona cu tanto a sacrifica pa nos pais. Di acuerdo cu e titular di cultura, e pensamento aki ta cuadra cu e maneho di e Gobierno aki, esta pa crea un comunidad feliz, consciente y uni. E manifestacion cultural riba Plaza Betico Croes tambe ta dedica na nos baile folklorico, dedica tambe n’e bida di Betico Croes cu a mira e importancia di nos cultura den nos bida diario. Betico Croes semper tabata activo riba diferente tereno

cultural. Un di esnan cu sigur el a participa activamente den dje, ta Festival di Dande. Esey ta un patrimonio y herencia cultural unico cu ta pertenece na nos y cu no ta existi na ningun otro parti di mundo.

“Betico Croes, ademas di ta nos Libertador e ta un gran protector di nos cultura cu a stima nos con ta balor y stima locual ta di nos”, asina Minister Michelle Hooyboer-Winklaar a termina bisando den su discurso.

